

La pld è cun distanza la ferma partida

Co sa repartan las forzas en il cussegl grond?

DA CLAUDIA CADRUVI / ANR

■ **Cun 40 deputads è la pld la partida dominante en il cussegl grond. Ella tegna sin distanza la pcd cun 32 deputads e la pbd cun 27 deputads. L'emna proxima cumenza la legislatura 2010 enfin 2014.** Tar las trais partidas grondas correspunda il dumber da deputads er al dumber da commembers da fracziun. Las trais partidas burgaisas occupeschan 99 sez. Entras la mort da Rodolfo Plozza dumbra il cussegl grond mo pli 119 deputads, explitgescha *Domenic Gross* dal secretariat dal cussegl. Il suppleant da Brusio, che vegn per Plozza a Cuir, n'obtegnia betg in «status» da deputat.

Das pitschnas fracziuns

La pcd perda uschia in sez ed ha empè da 33 vuschs mo 32 vuschs en sia fracziun. Persuenter profitescha la ps che avess mo 12 deputads. La ps vegn rinforzada da duas persunas. *Dario Monigatti*, il suppleant da Brusio, è socialdemocrat. Pli-

navant ha *Nicoletta Noi* (senza partida/Roveredo) decida da politisar en questa legislatura ensemen cun la ps. Uschia po la fracziun da la ps dumbrar 14 vuschs.

La pps ha quatter deputads e po perquai betg furmar ina atgna fracziun. Ma ensemen cun *Renatus Casutt* (senza partida/Glion) furman ins la fracziun dals liberals. En il cussegl grond politiseschan pia en tut tschintg fracziuns.

Ils dus deputads verd-liberals restan senza fracziun.

Paucas dunnas

26 deputadas han conquistà in sez en il cussegl grond. Las pli bleras dunnas politiseschan en la pld che dumbra diesch deputadas. Era la pcd è represchentada bain cun sis deputadas. Sch'ins na guarda dentant betg sin las cifras absolutas, mabain resguarda las procentualas, na vesi betg pli ora uschè bain per la pld. Lezza ha lura mo pli ina procentuala da dunnas da 25 pertschient. La pcd na

13 numalins – ina trapla per schurnalists

Attenziun! Il nov cussegl grond è ina trapla per schurnalists che han la saira prescha da dar giu las contribuziuns e n'han strusch pli peda da verifitgar nums. En il nov cussegl grond hai 13 numalins. Deputads cun la schlattaina Michael u Michel datti perfin trais. Quai munta ch'i dat 27 deputadas e deputads ch'ins po tgunsch scumbigliar. Savens èn ils numalins anc en la medema partida u derivan dal medem circul. En questa glista da numalins figureschan era persunas cun nums sumegliants, sco Heinz e Heiz u Nick e Nigg.

La glista dals numalins

Heinrich Berther (pcd) e *Placi Berther* (pcd)

Duri Bezzola (pld) e *Jachen Bezzola* (pld)

Renatus Casutt (senza partida) e *Silvia Casutt* (pcd)

Christian Hartmann (pld) e *Jann Hartmann* (pld)

Robert Heinz (pbd) e *Karl Heiz* (pld)

Felix Koch (pbd) e *Jan Koch* (pps)

Andy Kollegger (pbd) e *Ralf Kollegger* (pcd)

Leonhard Kunz (pld) e *Rudolf Kunz* (pld)

Gian Michael (pbd), *Maurizio Michael* (pld) e *Hans Peter Michel* (pld)

Reto Nick (pld) ed *Ernst Nigg* (pps)

Gian Peter Niggli (pld) e *Bernhard Niggli* (pbd)

Rico Striffler (pbd) e *Vera Striffler* (pld)

Maurus Tomaschett (pcd) e *Gabriela Tomaschett* (pcd)



Mesemna cumenza la sessiun dal cussegl grond en nova cumposiziun.

FOTO N. SIMMEN

vegn strusch sin 20 pertschient e la pbd cuntanscha mo pauc dapli che 10 pertschient. Meglier vesi ora tar la ps. Lezza ha cun 40 pertschient la meglra represchentanza da dunnas.

«Jau empermet»

49 deputads e deputadas vegnan la mesemna proxima per l'emprima giada en il cussegl grond. La seramentaziun vegn fatga cun tut ils commembers dal cussegl grond e betg mo cun ils novs. Ils deputads ston responder sin la dumonda ch'è fixada en l'urden dal parlament:

«Vus, sco commembers elegids dal cussegl grond, empermettais d'ademplier tut las obligaziuns da Voss uffizi tenor meglier savair e pudair.» Ils deputads respundan cun «jau empermet» u «jau engir».

La pli veglia ed il pli giuven

La pli veglia deputada en il cussegl grond è Nicoletta Noi (senza partida/Roveredo) cun l'annada 1940. Il pli giuven deputà è *Sascha Müller* (ps/Tavau) cun l'annada 1988.

La nova legislatura vegn avverta la pro-

xima mesemna cun in pled da *Vincent Augustin* (pcd/Cuir). El obtegnia questa onur perquai ch'el politisescha dapi il 1987 – e cun quai il pli ditg da tuts – en il cussegl grond.

Quants deputads ha mintga partida?

partida	dumber dals deputads
pld	40
pcd	32
pbd	27
ps	12
pps	4
verdliberals	2
senza partida	2
total	119

Tschintg fracziuns

fracziun	dumber da commembers
pld	40
pcd	32
pbd	27
ps	14
	(cun suppleant)
pps/liber	5
senza fracziun	2

Quantas dunnas ha mintga partida?

partida	dunnas
pld	10
pcd	6
ps	5
pbd	3
pps	1
senza partida	1
total	26